

**प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)**

18.10 बुधवार

दिनांक 04.06.2025

प्रमुख समाचार –

- 1— मुख्यमंत्री विष्णुदेव साय के अध्यक्षता में आज होय राज्य मंत्रिमंडल के बैठका में दू हजार पच्चीस बर स्थानांतरण नीति के अनुमोदन करे गीस—चौदह ले पच्चीस जून तक होही तबादला।
- 2— मंत्रिपरिषद ह निम्न अउ मध्यम वर्गीय परिवार मन ल सहर में किफायती अउ सस्ता भूखंड उपलब्ध कराव बर छत्तीसगढ़ किफायती जन आवास नियम के अनुमोदन करे हे।
- 3— विश्व पर्यावरण दिवस में काली प्रदेश में होही कतकोन कार्यक्रम।

अब समाचार विस्तार ले

मंत्रिपरिषद निर्णय

मुख्यमंत्री विष्णुदेव साय के अध्यक्षता में आज मंत्रालय में होय राज्य मंत्रिमंडल के बैठका में कतकोन महत्वपूर्ण निर्णय ले गीस। कैबिनेट मंत्री विजय शर्मा ह बैठका में ले गे निर्णय के जानकारी देवत बतईन कि मंत्रिपरिषद ह राज्य सासन के बछर दू हजार पच्चीस बर स्थानांतरण नीति के अनुमोदन करे हे। एखर तहत जिला स्तर में स्थानांतरण चौदह ले पच्चीस जून तक प्रभारी मंत्री डहार ले अउ राज्य स्तर में विभागीय मंत्री के मंजूरी ले होही। आवेदन छह ले तेरह जून तक स्वीकार करे जाही।

कैबिनेट मंत्री विजय शर्मा ह बतईन कि मंत्रिपरिषद ह छत्तीसगढ़ राज्य के कला अउ संस्कृति ल बढ़ावा दे बर कलाग्राम के स्थापना बर नवा रायपुर में संस्कृति विभाग ल दस एकड़ भूमि निःशुल्क आवंटित करे के निर्णय लेहे। उहें, नवा रायपुर में राष्ट्रीय स्तर के तीरंदाजी अकादमी के स्थापना बर खेल अउ युवा कल्याण विभाग ल तेरह एकड़ ले जादा के भूमि निःशुल्क आवंटित करे के प्रस्ताव ल मंजूरी दे गेहे।

मंत्रिपरिषद ह राज्य के निम्न अउ मध्यम वर्गीय परिवार मन ल सहर में किफायती अउ सस्ता भूखंड उपलब्ध कराव बर छत्तीसगढ़ किफायती जन आवास नियम के अनुमोदन करे हे। श्री शर्मा ह बतईन कि प्रदेश में युवा कल्याण के आने-आने क्षेत्र में उल्लेखनीय कार्य करइया मनखे अउ संगठन ल सम्मानित करे बर छत्तीसगढ़ युवा रत्न सम्मान योजना सुरू करे के निर्णय ले गेहे।

उहें, खेल अउ युवा कल्याण विभाग के अंतर्गत कोच के पद में भर्ती बर राष्ट्रीय क्रीडा संस्था पटियाला ले प्रशिक्षक के डिप्लोमा के मापदंड ल एक वित्तीय बछर बर सिथिल करे के निर्णय ले गेहे। एखर संगेसंग मंत्रिपरिषद ह ग्रामीण अउ आदिवासी बहुल क्षेत्र में पर्यटन ल बढ़ावा दे अउ स्थानीय लोगन ल रोजगार के नवा अवसर प्रदान करे बर “छत्तीसगढ़ होमस्टे नीति” के अनुमोदन करे हे। उहें, मंत्रिपरिषद ह कुछेक ग्राम पंचायत के नाव बदले के निर्णय घलो लेहे।

प्रधानमंत्री-योग

प्रधानमंत्री नरेन्द्र मोदी ह ए बछर योग दिवस के प्रति लोगन में उछाह देखके खुसी जताय हे। सोशल मीडिया पोस्ट में श्री मोदी ह कहिन कि योग ल लोकप्रिय बनाव बर आंध्रप्रदेश के लोगन के योगांध्र एक दिन सराहरीय प्रयास हरय। प्रधानमंत्री ह लोगन ले योग दिवस मनाव अउ योग ल अपन जीवन में नियमित रूप ले अपनाव के आह्वान करीन हे।

संसद—मानसून सत्र

संसद के मानसून सत्र इक्कीस जुलाई ले सुरू होही। विपक्षी पार्टी डहार ले ऑपरेशन सिंदूर उपर संसद म चर्चा बर विशेष सत्र बुलाय के मांग ल देखत सरकार ह ए निर्णय लेहे। संसदीय कार्यमंत्री किरेन रिजिजू ह पत्रकार मन ले गोठबात म कहिन कि संसद के मानसून सत्र बारह अगस्त के संपन्न होही।

सर्वदलीय प्रतिनिधिमंडल—दौरा

आतंकवाद के खिलाफ भारत के दृढ़ रुख के संदेश लेके दुनियाभर के देश मन म गे सात बहुदलीय प्रतिनिधिमंडल म ले चार सफल यात्रा के बाद अपन देस आगे हे। शिवसेना सांसद श्रीकांत शिंदे के नेतृत्व म प्रतिनिधिमंडल संयुक्त अरब अमीरात, लाइबेरिया, कांगो गणराज्य अउ सिएरा लियोन के दउरा के बाद आज बिहनिया भारत लहुटीन।

इही बीच, कांग्रेस सांसद शशि थरूर के नेतृत्व म सर्वदलीय प्रतिनिधिमंडल वाशिंगटन डीसी म अमेरिकी कांग्रेस अउ प्रसासन के सदस्य, विचारक, मीडिया अउ नीति निर्माता ले मिलके ओमन ऑपरेशन सिंदूर अउ आतंकवाद के विरुद्ध भारत के रुख के बारे म जानकारी दीही।

उहें, भाजपा सांसद रविशंकर प्रसाद के नेतृत्व म प्रतिनिधिमंडल वर्तमान म बेल्जियम के ब्रुसेल्स म यूरोपीय संघ मुख्यालय के दउरा म हे।

वार्षिक हज यात्रा

भारत संग दुनियाभर ले लगभग अट्ठारह लाख हजयात्री आज ले सुरू होय पांच दिन के वार्षिक हज यात्रा बर सऊदी अरब के मीना म एकत्रित होवत हे। ए लोगन मन ह पवित्र सहर मक्का ले अपन यात्रा सुरू करीन। हजयात्री आज रतिहा मीना म रुकही अउ काली बिहनिया हज के मुख्य रस्म अदा करे बर अराफात के मैदान जाही। भारतीय हजयात्री “हज सुविधा” मोबाइल ऐप्लीकेशन अउ समर्पित टोल-फ्री नंबर के माध्यम ले सहायता प्राप्त कर सकत हे।

कृषि मंत्री—खाद/बीज

कृषि मंत्री रामविचार नेताम ह प्रदेश म नकली खाद-बीज बेचइया मन उपर कार्रवाई के निरदेश देहे। ओमन ह एमा अधिकृत विक्रेता मन ल जुड़े पाय जाय म एफआईआर करे के संगेसंग उखर लाइसेंस रद्द करे बर घलो केहे हे। श्री नेताम ह विभागीय अधिकारी मन ल खाद अउ बीज विक्रेता मन उपर नजर राखे, स्टॉक के नियमित परीक्षण करे, गुणवत्ता अउ मानक के जांच करे अउ ए संबंध म किसान मनके सिकायत म तुरते कार्यवाही के निरदेश दीन हे। प्रदेश म नकली खाद के बिक्री अउ जमा खोरी के बढ़त घटना ल देखत सरकार एला गंभीरता ले लेवत हे। कृषि मंत्री ह किसान मन ले अपील करे हे कि खाद अउ बीजा अधिकृत विक्रय केन्द्र ले ही खरीदय।

शिक्षक काउंसिलिंग प्रक्रिया

स्कूल मन म युक्तियुक्तकरण के तहत राज्य के सोलह जिला के अतिशेष चार हजार चार सौ छप्पन सहायक शिक्षक, प्रधान पाठक अउ व्याख्याता मनके काउंसिलिंग के प्रक्रिया पूरा होगे हे। ए शिक्षक मनके नवा पदस्थापना आने-आने जिला म कर दे गेहे। बांचे जिला म काउंसिलिंग के प्रक्रिया चलत हे।

खबर के मुताबिक दस हजार ले जादा स्कूल म ले सिर्फ एक सौ छियासठ स्कूल के समायोजना होही, जेमा एक सौ तैंतीस स्कूल ग्रामीण इलाका के हरय। एखर ले कोनों भी स्थिति म लइका मनके पढ़ाई प्रभावित नइ होही।

विकसित कृषि संकल्प अभियान

विकसित कृषि संकल्प अभियान के तहत ए दिन प्रदेश के आने-आने जघा म कृषि वैज्ञानिक मनके टीम जाके किसान मन ले सीधा गोठबात करत हे। रायपुर स्थित राष्ट्रीय जैविक स्ट्रेस प्रबंधन संस्थान-आई.सी.ए.आर. के वरिष्ठ वैज्ञानिक डॉक्टर विनय कुमार ह आकाशवाणी समाचार ल बतईन कि आज उंखर टीम बेमेतरा जिला के साजा विकासखंड पहुंचीन, जिहा किसान मन ल कृषि से संबंधित जानकारी दे गीस।

विश्व पर्यावरण दिवस

काली विश्व पर्यावरण दिवस हरय। ए मउका म छत्तीसगढ़ पर्यावरण संरक्षण मंडल डहार ले काल रईपुर स्थित नवीन विश्राम गृह म पोस्टर प्रतियोगिता के आयोजन करे जाही। प्रतियोगिता बिहनिया दस बजे ले सुरु होके साढ़े ग्यारह बजे तक चलही। पोस्टर प्रतियोगिता ल चार आयु वर्ग म बांटे गेहे, जेमा पहिली वर्ग बारह बछर तक, दूसर वर्ग तेरह ले सत्रह बछर, तीसरइया वर्ग अट्ठारह ले इक्कीस बछर अउ चौथा वर्ग दिव्यांग मन बर हवय। ए बछर प्रतियोगिता के बिसय – “प्लास्टिक प्रदूषण-दुष्प्रभाव एवं समाधान” राखे गेहे। ए प्रतियोगिता न सिरिफ युवा मन म रचनात्कता ल प्रोत्साहित करही, भलूक प्लास्टिक प्रदूषण जइसन गंभीर पर्यावरण मुद्दा उपर जागरूकता फैलाय म घलो अहम भूमिका निभाही। प्रतिभागी मन ल रजिस्ट्रेस कराय बर बिहनिया साढ़े नौ बजे तक नवीन विश्राम गृह म उपस्थित होना होही।

विश्व पर्यावरण दिवस म काली नौ बजे ले नौ बजके दस मिनट म आकाशवाणी केन्द्र, रायपुर ले विशेष कार्यक्रम के प्रसारण करे जाही। एला छत्तीसगढ़ स्थित आकाशवाणी के सबो केन्द्र रिले करही।

कांग्रेस नेता-न्यायिक रिमांड

सोशल मीडिया प्लेटफॉर्म म प्रधानमंत्री नरेन्द्र मोदी के खिलाफ अश्लील भाषा के प्रयोग करत कमेंट्स करे के मामला म कांग्रेस नेता बृजमोहन सिंह ल न्यायिक रिमांड म दुर्ग सेंट्रल जेल भेज दे गेहे। पुलिस ह उंखर मोबाइल घलो जब्त कर लेहे, जेला जांच बर फॉरेंसिक लैब भेजे जाही। ए मामला ल लेके उंखर खिलाफ भाजपा नेता मन ह वैशाली नगर थाना म सिकायत दर्ज कराय रिहीस।

बालोद-जल संचय जनभागीदारी

जल संरक्षण अउ संवर्धन के क्षेत्र म बालोद जिला ह नवा कीर्तिमान स्थापित करे हे। जल संचय-जनभागीदारी अभियान म करे गे उत्कृष्ट काम बर बालोद जिला, देस म तीसरा स्थान पाय हे। केन्द्रीय जल शक्ति मंत्री सीआर पाटिल अउ जल शक्ति मंत्रालय के सचिव देवाश्री मुखर्जी ह काली वीडियो कान्फ्रेंसिंग के माध्यम ले देस के चौतीस जिला के अधिकारी मनके संग बइठका करीन। ओमन ह बालोद जिला म जल संरक्षण के क्षेत्र म करे गे काम के सराहना करीन।

खबर के मुताबिक “कैच द रेन” अभियान के तहत जिला म वर्षाजल ल संचित करे बर तरिया, कुआं, सोकपिट, गड्डा के निर्माण अउ रेन वॉटर हार्वेस्टिंग जइसन संरचना के निर्माण करे गेहे।
